

KUKI WORSHIP SERVICE PHACHOM AM?

Martin zairem Hengna

Mihem koima ahinkho dinga kisalel lou aumpon, akhonung hinkho ding gelkhoh lou jong koima aumpoi. Hijeh'a chu mihemkhat kiti moh hin theilou, changa leiset a khosa thei hilou lungdon khoisat na aneithe, heng le kom ngaicha jing chuleh alungdon nem pi ding angaichat jing ahi. Hijeh'a chu mihem te kilam hilna ding, akipui jang nading chuleh lungdon khoisatna gama kinepna neipuma ahin thei na din tonsot kipana thupha jesun ahin potai. Kuki te lah'a jong kipana thuphan eihin phauvin tun hiche thupha jal hin kinepna le khantou-machal nam le gam sunga ahung umin het manlou vin khopi le tolpi sungah lekha sim, service bol chule kivei mi tampi ium tauvin, hiche ho khankho le khonung ding gel khohna ananei lamkai masa hon kidatkhen na umlou K.W.S. ana boldoh ui. Heche K.W.S. hin phatchom eipeh mongu nam veo hite.

1. Changval dia phachom : Mihem koima achamkim(perfect) aumlou na banah, huhhingna chan kikop thei ahipoi. Khopi, tahsan lah hithei atahsan lou lah jong hithei na muna mihem Kuki chapa-chanu aumteng amasapena ngaichat chu pathen thu'a akai hoi le apui hoi ding amihem chanpi, asopi angaichat ding chu seilouva het ahi(pahcha jong tui aki chaplou teng amoul theiye).Hitobang pathen thu le la a akaihoi ding asopi u le nao ngai cha hodin K.W.S. hi lungngap na anei thei ahitai.
2. Changval dia khantouna: Khopi a um atamjo lekha sim ahin, alekha simna ban'a japi le ama changval'a aphot chompi thei tampi Houbunga konin akilam doh theiye. Vetsahnan mi khat chu houbunga alhat teng akingaina thei ding nu le pa, loi le gol pha kimudoh nan aneiyin, kikhop khomna'a chanvou ahung chang jin ahi. Hiti ho'a kona chu mihem khat chun mai ngamna, lungletna,minejouna, kivaihom dan, chuleh ahideh'a nun le khan akijildo theiyin ahi.K.W.S. um hih leh ahi deh'a khopi a um simlai hodia hitobang kijil dohna chu um jong leh ahi deh'a kuki hodia hahsa ding ahi.
3. Jalhang dia phachom: Alhangpi'a seidingin K.S.O. leh K.W.A. um jong leh, K.W.S hi ana um hih leh jalhang hinkhoa kimanchah naho hi hoi le kitup sel'a ache lhah jing ding hi tahsan um jong leh ahah sat na tampi jong aum ding tahsan ahi. Ajeh chu jalhang kiloikhom na dia kimuto jing le ki khopkhom jing chu machal na dinga ngaikhoh ahi banah, jalhang kimanchah na chu hou vin apui hoi jing ngaiyah ahi.Hiche dinga K.W.S tia imin vo min uva pathen ni seh'a houkhom ibol theiyu hin jalhang kimanchah na din phat chom na lentah aum'n ahi. Ajeh chu hapta seh'a kikhop khom aum teng hapta seh'a jalhang kimanchah na'a het ding, sei ding chuleh bol dinga ngai khoh atamjo suh lel le tohdoh theiyin aum jin ahi. Vetsahna seidin 2009 Chavang Kut K.W.S. houin mun'a aki man chu ahi.
4. Pumkhat hina'a phachom: Thil tampi kisei jong leh kws machalna hi kilung khat le pumkhat hina akon hidin tahsan aum'e. ajeh chu christain chate jouse chun eikou pao khat ahi banga eiho jong khat ihi diu chu sei lou het ahi.Ahin, vang set umtah chu inam sungu leh igam sungu va kipana thupha kisan na'a dei um lou pen ki khentel na le kibungkhen na ina kisan tha uhi ahi.Hiche kikhen na ho jeh'a hi gam le nam jong khantou machal lhasam chom hidin jong tahsan aume. Hitobang dinmun, immun le tolsunga umjong leh K.W.S. beh'a kilung khat le pumkhat'a i um theiyu hi ihamphat noa khat ahi . Hiche hin nikhat gam le nam sunga houbung kikhen adih loudan leh kilungkhat(pumkhat) hilou angai khoh dan ahin suhlang ding hi houbung mite kinepna hidin tahsan ahi.

5. Pakai thupeh tohdoh na'a phachom: Christain te hoilaiyin um jong leuhen itoh diu kin khoopen le lenpen chu kipana thupha seiphong ding, atahsan lou ho jesu tahsan sah ding hi ahi (Matthew 28:19-20). Khopi'a um chun hiche kin bol na ding hin hahsah na lentah aume, ajeh chu aum sun toh le tham nei ding sa'a umcheh ihiove. Tahsa tah'n chethei hih jongleu hen, toh thei na lampi chu inei tao vin ahi. K.W.S'a kikhop khom ibol uva eiho tahsa le lhagao va iki til khou naban uvah, nei le nga itoh khom uva, hiche ito khom naho va kon'a pathen thusei ding missionary isol doh theiyu hi pathen thupeh khohtah kin chu chamkim hih jong leh tongdoh thei dinmun'n ium theyun ahi.

Pathenin nin K.W.S. khantou,machal chuleh kilungkhat nan ma pui jing taken.